

Na osnovu člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08) i člana 11. Zakona o finansiranju institucija Bosne i Hercegovine („Službeni glasnik BiH“, br. 61/04, 49/09, 42/12, 87/12 i 32/13), Vijeće ministara Bosne i Hercegovine, na 127. sjednici, održanoj 25. marta 2015. godine, donijelo je

ODLUKU

O PRIVREMENOM FINANSIRANJU INSTITUCIJA BOSNE I HERCEGOVINE ZA PERIOD APRIL-JUNI 2015. GODINE

Član 1.

(Predmet odluke)

Ovom Odlukom odobrava se privremeno finansiranje institucija Bosne i Hercegovine za period april-juni 2015. godine.

Član 2.

(Visina sredstava za privremeno finansiranje)

- (1) Privremeno finansiranje institucija Bosne i Hercegovine za period iz člana 1. ove Odluke utvrđuje se na osnovu Zakona o Budžetu institucija Bosne i Hercegovine i međunarodnih obaveza Bosne i Hercegovine za 2014. godinu („Službeni glasnik BiH“, br. 104/13 i 60/14) i u skladu sa članom 11. stav (6) Zakona o finansiranju institucija Bosne i Hercegovine.
- (2) Za finansiranje institucija Bosne i Hercegovine u periodu april-juni 2015. godine raspoloživa sredstva iznose do 237.500.000 KM što predstavlja $\frac{1}{4}$ sredstava odobrenih za finansiranje institucija Bosne i Hercegovine shodno Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2014. godinu.

Član 3.

(Raspored rashoda po budžetskim korisnicima)

- (1) Raspored rashoda po budžetskim korisnicima za period iz člana 1. ove Odluke za tekuće rashode vršit će se na osnovu budžeta korisnika utvrđenih u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2014. godinu u iznosima kojima se omogućava obavljanje aktivnosti za zakonom utvrđene nadležnosti budžetskih korisnika. Ministarstvo finansija i trezora sa budžetskim korisnicima usaglašava operativne planove potrošnje za period važenja ove Odluke.
- (2) Raspored rashoda na stavci Direktni transferi sa Jedinštenog računa trezora stavka 99991 utvrđenih Zakonom o Budžetu institucija Bosne i Hercegovine i međunarodnih obaveza Bosne i Hercegovine za 2014. godinu, vršit će se u skladu sa dospijućem obaveza po pojedinim stavkama.

Član 4.

(Višegodišnji projekti)

Nastavak finansiranja višegodišnjih projekata koji su usvojeni u budžetima prethodnih godina, kao i programa posebnih namjena vršit će se iz sredstava koja su prenesena u skladu sa članom 14. Zakona o finansiranju institucija Bosne i Hercegovine, odnosno koja su osigurana namjenskim donacijama.

Član 5.

(Provođenje odluke)

Provedbu ove Odluke vršit će Ministarstvo finansija i trezora Bosne i Hercegovine i institucije Bosne i Hercegovine koje se finansiraju iz Budžeta, u skladu sa odredbama i procedurama utvrđenim u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2014. godinu i Zakonom o finansiranju institucija Bosne i Hercegovine.

Član 6.

(Stupanje na snagu)

Ova Odluka stupa na snagu danom donošenja i objavljuje se u "Službenom glasniku BiH", a primjenjivat će se od 1. aprila 2015. godine.

VM broj ____/15
25. marta 2015. godine
S a r a j e v o

Predsjedavajući
Vijeća ministara BiH
Vjekoslav Bevanda